

KONTROL MOZIOA

ADINGABEAK ETA FAMILIAK KALE EGOERAN UZTEA DELA ETA

Olaia Duarte Lopezek, EH BILDU udal taldeko zinegotziak, Udaltzatzen Organo Araudiaren 98. artikulua oinarri, mozio hau aurkezten du Udaltzatzen azter dadin. Mozioa 2019ko azaroaren 11n Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

2019ko ekainaren 5ean dei bat jaso genuen Donostiako Harrera Saretik, Abegi Etxean zegoen familia baten egoeraren berri emanez. Dirudienez, lau pertsona errefuxiatuz osatutako familia bat zen, bi adingabe barne. Familia lau egunez egon zen Abegi Etxean, baina plazarik gabe gelditu behar zutela adierazi zieten, kale egoeran geldituz.

Harrera Saretik egoeraren berri eman ziguten irtenbide bat bilatzeko helburuarekin eta egun berean Gizarte-ekintzako delegatuarekin hitz egin genuen familiaren egonaldia Abegi Etxean luzatzeko, CEAR-en baliabide batera sartu arte.

3/2005 legeari (otsailaren 18koa, haurrak eta nerabeak zaintzeko eta babestekoa) erreparatzen badiogu, 50. artikuluan honako hau aipatzen du:

50. artikulua – Agintarien eta herritarren betebeharrak.

- Bai agintariek eta zerbitzu publikoek bai herritarrek, batez ere lanbidea edo betetzen duten eginkizuna tarteko haur edo nerabe bat arrisku edo babesgabezia egoera batean egon daitekeela ikusten dutenek, haur edo nerabeari laguntza berehala eskaintzeko betebeharrak dute, eta, beren eskumenean badago, jarduteko, edo bestela, eskumena duten agintariei edo haien agente gertukoenei jakinarazteko; orobat, adingabearen legezko ordezkariak jakinarazi behar dizkiete egitateak, edo, beharrezkoa bada, ministerio fiskalari ere bai.

Hortaz, argi dago zerbitzu publikoek ezin dutela babesgabezia egoerarik eragin adingabeak kale egoeran utzita, nahiz eta haiei bideratutako baliabideak beteta egon.

2019ko uztaileko batzordeetan, Gizarte-ekintzako delegatua interpelatzerakoan, adierazi zigun egia dela horrelako egoerak gertatzen direla eta zerbitzuak beteta daudenean beste aukera batzuk erabili behar direla. Esate baterako, hotelak, emergentziazko pisuak eta abar.

Gauzak horrela, uztaileko udaltzatzen honako kontrol mozio hau aurkeztu genuen:

1.- Udalbatzak hertsatuki eskatzen dio Udal Gobernuari idatziz zehaztu dezala zein den kale egoeran dauden familiekin beteko den interbentzio prozedura, adingabeak kale egoeran gelditzea ekiditeko.

2.- Udalbatzak hertsatuki eskatzen dio Udal Gobernuari prozedura hori parteka dezala Gizarte-ekintzako kontseiluan parte hartzen duten eragileekin zein Donostiako Harrera Sareko ordezkariekin.

Kasu honetan, Udal Gobernuak ezezkoa eman zion proposamen honi eta hilabete honetan berriro jakinarazi zaigu ekainean emandako egoera ez dela berria eta berriro utzi direla familiak kale egoeran, nahiz eta adingabeak egon tartean, pertsona hauen harrera hirugarren sektoreko eragileetan delegatuz.

Esate baterako, urriaren 14an Donostiako Harrera Sareak lau kidez osatutako familia bat kale egoeran geldituko zela adierazi ziguten. Kasu honetan, lau urteko eta urtebeteko bi adingabe zeuden familia honetako kideen artean. Egun batzuez Donostiako Abegi Etxean egon eta gero, familiari egonaldia bukatu zitzaiola jakinarazi zioten eta urriaren 18tik aurrera Donostiako Meskitan lo egin dute, nahiz eta, hirian gelditzeko asmoa zutela adierazi duten eta lau urteko umea Intxaurrendoko eskolan matrikulatu duten.

Askotan entzun dugu Udal Gobernuaren ordezkarien ahotan ezin ditugula “hirira iristen diren pertsona etorkin guztiak artatu eta ez dugula baliabiderik guztiontzat” baina, talde honen iritziz, horrek ez du justifikatzen adingabeak kale egoeran uztea, 3/2005 legeak jasotzen duenaren aurkakoa eginez.

Azaroko batzordeetan delegatua interpelatu dugunean, Udal Gobernuak legea betetzen duela erantzun du; hau da, hirira iristen diren familiei eta pertsonen informazioa eta orientazioa ematen dietela udal gizarte zerbitzuetan. Baina, adingabeak dituzten familiak kale egoeran uztearen inguruan galdetu dugunean, adierazi du adingabe horiek baliabideetan artatzeko familietatik atera behar dituztela eta hori ekidin egin nahi dela. Azalpen hauen aurrean, ezin dugu konpartitu adingabeak artatzeko formula bakarra haien familietatik ateratzea dela, borondate politikoaren kontua baita kale egoeran dauden eta Donostian gelditu nahi duten familiei baliabide sozial bat eskaintzea.

Hortaz, azaldutako egoera kontuan hartuta, behean sinatzen duen zinegotziak honako MOZIO hau aurkezten du:

KONTROL MOZIOA

1.- Udalbatzak hertsatuki eskatzen dio Udal Gobernuari, Donostia Harrera Hiria den heinean, kale egoeran dauden, adingabeak dituzten eta hirian gelditu nahi duten familiak artatzeko neurriak eta baliabideak martxan jar ditzala.

2.- Udaltzarak hertsatuki eskatzen dio Udal Gobernuari adingabeak dituzten familiak kale egoeran ez uzteko konpromisoa har dezala.

Donostian, 2019ko azaroaren 14a

Olaia Duarte López
EH Bildu udal taldeko zinegotzia